

procuratæ per se salutis exemplum, virtutis suæ potestatem in humanis corporibus exercuit; ubi vero in contumaces formam severitatis consti-
tuebat, futuri speciem damno arboris indicavit; et præcipue (ut Chrysostomus dicit) in fcul-
nea, quæ est humidissima, ut miraculum ma-
jus appareat.

Ad tertium dicendum, quod Christus etiam in aqua et in aere fecit miracula quæ sibi con-
veniebant, quando, scilicet, ut legitur Matt. 8¹, imperavit ventis et mari, et facta est tranquillitas magna. Non autem conveniebat ei, qui omnia in statum pacis et tranquillitatis revo-
care venerat, ut vel turbationem aeris, vel di-
visionem aquarum faceret. Unde Apostol. di-
cit, Hebr. 42: Non accessistis ad tractabilem et accensibilem ignem, et turbinem, et caliginem, et procellam. Circa passionem tamen di-
visum est velum, ad ostendendum reserationem mysteriorum legis. Aperta sunt monumenta, ad ostendendum quod per ejus mortem mortuis vita daretur. Terra mota est, et petrae scissæ sunt, ad ostendendum quod lapidea hominum corda per ejus passionem emollirentur, et quod totus mundus virtute passionis ejus erat in me-
lius commutandus.

Ad quartum dicendum, quod multiplicatio panum non est facta per modum creationis, sed per additionem extraneæ materiæ in panes con-
versæ. Unde Augustinus super Joann. dicit¹: Unde multiplicat de paucis granis segetes, inde in manibus suis multiplicavit quinque pa-
nes. Manifestum est autem quod per conversio-
nem grana multiplicantur in segetes.

COMMENTARIUS.

Littera D. Thomæ est elegantissima et perspicua. Solum ergo superest circa totam quæstionem animadvertendum, D. Thomam mentionem fecisse omnium miraculorum quæ circa res a se distinctas operatus est Christus, prætermisso autem ea quæ circa seipsum est operatus, cum tamen illa sint omnium excellentissima et maxima, et ad doctrinam Christi confirmandam efficacissima, ex quibus alia facta sunt in Christi infantia, ut partus ex Virgine; alia tempore prædicationis, ut quod quadraginta diebus sine cibo et potu jejunaverit, quod super aquas ambulaverit, etc.; alia in ejus passione et morte, ut quod aqua et sanguis fluxerint e corpore jam emortuo;

* Loco jam dicto in princ. hujus solu-
tionis.

alia in ejus resurrectione. Hæc vero non sine causa prætermisit D. Thomas. Nam inter hæc quædam sunt quæ ita pertinent ad corpus Christi, ut etiam fiant circa res alias, ut est occultari sensibus, ambulare super aquas, et hæc non sunt omissa, sed inter illa censentur miracula, quæ circa res alias sunt facta. Alia vero sunt miracula propria ipsius corporis Christi, quasi in ipso manentia, et hæc inter mysteria ipsius vitæ Christi merito numerantur et declarantur, sicut in superioribus factum est de miraculis infantiae et jejunii, et inferius fiet de miraculis passionis et resurrectionis; et ideo nullum ex his miraculis declaraendum supererat, præter quam transfigura-
tionem.

DISPUTATIO XXXI,

In quatuor sectiones distributa.

DE EFFICACIA MIRACULORUM CHRISTI AD DOCTRINAM EJUS SUADENDAM.

De miraculis Christi secundum se, id est an vere facta sint, quave potestate ac virtute, quaque actione ac modo, nihil hoc loco ad-
endum occurrit iis quæ in priori tom., disp.
31, tractavimus. Quoniam vero ea miracula Christus edidit ad suam divinitatem manifestandam, confirmandamque doctrinam, illud videtur hujus loci proprium, ut ostendamus quam fuerint ad hunc finem assequendum efficacia. In quo tria potissimum consideran-
da veniunt, scilicet, quam fuerint illa miracula ad prædictum effectum necessaria vel utilia; rursus quam sufficientia et efficacia; ac denique in quibus hunc effectum habuerint.

SECTIO I.

Utrum miracula Christi fuerint simpliciter neces-
saria ad suadendam ac confirmandam ejus doc-
trinam.

1. Ratio dubitandi est, quia ipsemet Christus, Joan. 15, dicit: *Si opera non fecissem eis, quæ nemo aliis fecit, peccatum non haberent; ergo erant illa opera simpliciter necessaria, ut homines Christo credere tenerentur, quandoquidem sine illis non peccarent non credendo; certum est autem Christum de peccato infidelitatis fuisse locutum; ergo fuerunt illa miracula necessaria ut Christi doc-*

DISPUTAT. XXXI. SECT. I.

trinam satis credibilem redderent. Quia (ut constat ex materia de fide) obligatio ad cre-
dendum statim oritur, cum doctrina suffi-
cienter prædicaturae proponitur. Unde, Joann. 10, ait ipsemet Christus: *Opera, quæ ego fa-
cio in nomine Patris mei, hæc testimonium perhibent de me; et infra: Si non facio opera
Patris mei, nolite credere mihi.* In quibus conditionatis locutionibus necessitas talis mediæ virtute continetur. In contrarium vero est, quia præter miracula possunt esse alia testi-
monia, quæ ad doctrinam confirmandam suf-
ficiant, ut sunt vitæ puritas cum sapientia conjuncta, unde Christus dicebat: *Quis ex vobis arguet me de peccato? Si veritatem dico vobis, quare non creditis mihi?* Joann. 8. Item, prophetia, quæ cum impleta ostenditur, suf-
ficiens est veritatis testimonium; sic igitur Christus sine miraculis poterat ex prophetiis impletis ostendere se esse verum Messiam (ut saepius fecit); hoc autem principium suf-
ficiens erat ut ostenderet se esse Deum, nam hoc etiam de vero Messia erat predictum; ergo hoc etiam satis erat ut suæ doctrinæ ve-
ritatem confirmaret. Et confirmatur, nam Joannes Baptista nullis factis miraculis sola vitæ sanctitate satis comprobavit testimonium quod de Christo reddebat, ita ut non possent Judæi prudenter non illi fidem adhibere; ergo, etc.

2. Suppono sermonem esse posse, vel de utilitate miraculorum ad confirmandam doc-
trinam, vel de necessitate simpliciter, quæ in-
telligi potest aut secundum legem Dei ordi-
nariam, aut etiam de potentia Dei absoluta;
rurus, vel de necessitate absoluta, id est,
nulla suppositione facta, vel de necessitate tantum ex hypothesi. Item tractari potest de necessitate, ut doctrina prudenter credi possit, vel non tantum ut possit, sed etiam debeat, nec possit homo sine infidelitate illi non assentiri. Denique sermo es-
se potest de necessitate vel in ordine ad fidem humanam, vel in ordine ad divi-
nam, id est, certam et infallibilem, quæ divina auctoritatē nitatur. Advertendum ultimo est, non esse hic sermonem de quacunque doctrina in generali, sed in particulari de doc-
trina Christi, quæ est supra omnem sensum,
et supra omnem creatum intellectum.

3. Miracula ad suadendam Christi doc-
trinam convenientissima. — Primo igitur certum est, ad suadendam hanc doctrinam aptissima media et convenientissima fuisse opera mira-
culosæ in ejus confirmationem facta. Hoc est

certissimum, primo, ex ipso usu, Christi testi-
monio confirmato, Joann. 5: *Vos misistis ad Joannem, et testimonium perhibuit veritati; et infra: Ego autem habeo testimonium maius Joanne. Opera enim, quæ dedit Pater, ut perficiam ea, illa testimonium perhibent de me;* et c. 10: *Opera, quæ facio in nomine Patris mei, hæc testimonium perhibent de me;* et infra: *Si mihi non vultis credere, operibus credite;* et c. 14: *Alioquin propter opera ipsa credite.* Idem confirmat potestas data Apostolis ad facienda miracula, quia post Christum futuri erant primi hujus doctrinæ prædicatores. Unde Paulus, ad Heb. 2: *Quomodo nos effugiemus, si tantum neglexerimus salutem, quæ cum initium accepisset enarrari per Dominum, ab eis qui audierunt, in nos confirmata est, contestante Deo signis et portentis.* Idem video licet in lege veteri. Moysi enim, quia futurus erat primus illius legislator, magna virtus et potestas in miraculis faciendis data est. Item apud omnes homines, qui Deo nolunt resis-
tere, magnam vim semper habuerunt miracula ad cœlestem doctrinam cognoscendam. Unde Joann. 3 dicebat Nicodemus: *Scimus quia a Deo venisti, Magister. Nemo enim po-
test hæc signa facere que tu facis, nisi fuerit Deus cum eo;* et 3 Reg. 17, mulier illa videns resuscitatum filium, dicebat ad Eliam: *In isto cognovi quod vir Dei es tu, et quod verbum Dei manet in ore tuo.* Ratio denique hoc confir-
mat, quia supernaturalis doctrina necesse est ut Deum ipsum habeat principalem auctorem et assertorem; ergo opera propria ipsius Dei sunt etiam aptissima ad confirmandam talem doctrinam; quod nimur a Deo ipso origi-
nem ducat. Quia evidens est talia opera non posse fieri nisi virtute divina; evidens rursum est non posse Deum sua auctoritate singularique virtute mendacium confirmare; et ideo hæc mira opera, in veritatis confirmationem facta, vocantur a Patribus, *quasi sigilum Dei*, quo talem doctrinam consignat.

4. Miracula non fuerunt simpliciter neces-
saria ad credendam Christi doctrinam. — Se-
cundo, certum est talia miracula non fuisse simpliciter necessaria, ut doctrina Christi pru-
denter credi posset et deberet, non solum fide humana ac formidolosa, sed etiam infusa ac certa. Hoc etiam existimo certum, et probatur primo exemplo adducto Joannis Baptis-
tæ, cuius testimonium de Christo tale erat, ut omni fide dignum esset; ita ut qui suffi-
cientem illius cognitionem haberet, graviter peccaret illi non assentiendo; sed ille non fe-

et miracula; ergo non sunt simpliciter necessaria ad hunc effectum, non solum de potentia absoluta, sed nec de ordinaria. Major patet ex illo Joann. 4: *Hic venit in testimonium, ut testimonium perhiberet de lumine;* opera autem Dei sunt perfecta, et quando ad munus aliquod seu ministerium destinat quempiam, dat ei omnia necessaria ad illud obeundum; dedit ergo Joanni omnia necessaria ut sufficiens testimonium de Christo redderet (alioqui quid opus erat insufficiente testimonio, et fide non digno?), et ideo Christus, Joann. 5, tacite reprehendit Iudeos, quod testimonio Joannis non habuissent fidem, ut ibi significarunt Chrys., hom. 39; et Cyril., lib. 2, cap. 149.

5. *Objectio.* — *Responsio.* — *Innocentia Christi quanta.* — *Efficacia verborum Christi quanta.* — Dices, Joanni non fuisse necessaria miracula, quia non introducebat novam legem, novam doctrinam supernaturalem, sed eamdem quam habebant Iudei stabiliebat et confirmabat, solumque monstrabat Messiam, quem ipsi expectabant. Accedit quod sanctitas et asperitas vitae ejus, magna auctoritas quam apud populum habebat, poterant ad prædictum genus doctrinæ confirmandum sine miraculis sufficere. Sed imprimis mysterium præcipuum, quod Christus et Joannes prædicarunt, et ex quo tota veritas doctrinæ utriusque pendebat, idem omnino fuit, scilicet, Jesum esse verum Filium Dei, et Messiam in lege promissum, qui peccata mundi tolleret, et spiritum vitae conferret; ergo ex parte doctrinæ eadem erat difficultas. Deinde quoad vite innocentiam et sanctitatem major fuit in Christo; et licet in exteriori modo vivendi major esset asperitas in Joanne, tamen hæc non est simpliciter necessaria ad veritatis confirmationem, quando alioqui puritas et innocentia vitae omnibus nota est, quæ tanta in Christo fuit, ut coram adversariis ausus sit dicere: *Quis ex vobis arguet me de peccato?* ubi non solum criminis probationem, verum ne probabilem quidem et apparentem objectionem extimuit. Tanta erat tamque omnibus evidens ipsius innocentia. Aliunde etiam superabat Christus Joannem in virtute, sapientia verborum, et in auctoritate qua loquebatur, *tangam potestatem habens.* Unde non dubito quin, seclusis miraculis, sola Christi prædicatio, prout ab illo fiebat, esset sufficiens ad doctrinam ita suadendam, ut ad adhibendam sibi fidem prorsus obligaret. Quomodo intelligi potest

quod ipsem Christus dixit, Joann. 15: *Si non venissem, et locutus eis non fuisset, peccatum non haberent; nunc autem excusationem non habent de peccato suo.* Ubi, nulla miraculorum mentione facta, inexculpabiles appellat eos qui sibi loquenti non crediderant. Tanta erat vis et efficacia verborum ejus. Unde Joann. 4, Samaritana absque miraculis propter solum Christi sermonem credidit, et postea, *multo plures crediderunt propter sermonem ejus, et mulieri dicebant: Quia jam non propter tuam loquelam credimus: ipsi enim audivimus, et scimus quia hic est Salvator mundi;* et tamen Christus ibi nulla miracula fecisse legitur, sed efficacia verbi sui illos ita interius commovit, ut et credere possent et tenerentur. Et hæc est ratio a priori hujus veritatis, quia Christi virtus non erat alligata miraculis, sed poterat aliis modis veritatem doctrinæ suæ ostendere et confirmare, atque ita eam prædicare, ut exterius sufficienter proponeretur, et interius etiam sufficienter excitaret atque illuminaret hominem, ut si vellet, posset quidem divino fultus auxilio sibi præsentissimo credere.

6. *Miracula ad firmandam Christi doctrinam quomodo necessaria.* — Dico tertio: miracula Christi Domini quodammodo dici possunt ad firmandam sufficienterque præponendam Christi doctrinam fuisse necessaria. Declaratur primo, quia quod moraliter est valde utile, dici potest quodammodo necessarium; miracula autem Christi fuisse ad hunc effectum valde utilia jam ostensum est. Et præter dicta notant Sancti Patres aliam utilitatem. Nam Christi opera simul erant et miracula, et magna beneficia et misericordiae opera hominibus collata, et ad illustrandum intellectum, et ad amorem conciliandum aptissima. Quoniam vero ad suscipiendam doctrinam, que evidenter non cogit intellectum, necessaria est pia voluntatis affectio, ideo ex hoc etiam capite fuerunt illa opera quodammodo necessaria, ut ea doctrina ab animis audientium benevolè suscipieretur. Secundo, quamvis miracula non sint necessaria singulis ut possint credere, tamen respectu communitatis possunt dici quodammodo necessaria, quia sine illis pauci credent. Cujus signum est, quia, intervenientibus signis et miraculis, pauci in Christum crediderunt; quid ergo si miracula non extitissent? Et hæc ratio necessitatis maxime augetur, si Ecclesia non consideretur solum prout erat in illis hominibus qui Christum

audierunt, sed ut erat perpetuo usque ad finem seculi duratura, in eis qui nec viderunt Christum, neque audierunt; et hoc sensu videtur dixisse Greg., l. 27 Moral., c. 6: *Sanctis prædicatoribus nequaquam ad persuadendum verba sufficiunt, nisi etiam miracula addantur.* Tertio, potest hæc necessitas ita explicari, ut non sit absoluta, sed ex suppositione. Prædictum enim erat Messiam patraturum magna miracula, ut constat Isa. 35, et aliis locis; ut ergo Christus persuaderet hominibus se esse verum Messiam, necessarium fuit ut miracula faceret, quæ de Messia erant prædicta. Quia, sicut necessarium fuit alia signa primi adventus Messiae impleri, ita et hoc.

7. *Responsio ad argumenta in oppositum.* — *Testimonii Joann. 15 prima expositio.* — Ex his ergo facilis est responsio ad rationes dubitandi initio positas. Nam, quæ secundo loco sunt positæ, secundam assertionem confirmant; quæ priori loco, juxta primam et tertiam exponi possunt uno e tribus modis. Primus est, si Christus tam mira opera non fecisset, Iudeos fore excusandos, ut saltem non eo genere peccati, nec tam graviter delinquerent, sicut nunc peccarunt, non vero quod omnino culpa vacarent. Nam etiamsi absque tot miraculis non crederent, esset ignorantia crassa et culpabilis; nunc autem non solum fuit ignorantia, sed et malitia, et blasphemia in Spiritum Sanctum. Ab hoc ergo peccato excusari possent, si non fuissent miracula, non tamen simpliciter ab omni peccato. Hanc responsem indicat Toletus, Joann. 4, annot. 27, in fine. Sed difficultatem patitur, quia verba Christi absoluta sunt et generalia; unde simpliciter negare videtur Iudeos commissarios peccatum infidelitatis, non credendo in Christum, si ipse miracula non fecisset. Ita videtur exponere Augustinus, tract. 89.

8. *Secunda expositio.* — Alter modus est, si Christus miracula non fecisset, plurimos Iudeorum excusari potuisse a peccato infidelitatis. Doctores enim, qui Scripturas intelligebant, Christique prædicationem faciliter poterant, inexcusabiles essent non credendo, etiam sine miraculis; at vero plebei, qui difficilius mysteria capiunt, potuerint excusari a peccato, si nulla miracula videbantur; visus autem tot miris operibus, inexcusabiles facti sunt. Hanc expositionem habet Toletus, c. 15, annot. 22. Sed non minorem difficultatem habet quam præcedens. Quia etiam quoad hoc, verba Christi sunt genera-

lia; immo (si recte series contextus consideratur) prædicta Christi verba potius ad principes quam ad plebem Iudeorum referebantur. Sic enim inquit: *Si me persecuti sunt, et vos persequentur;* at vero potius principes quam turba persecuti fuerant Christum. Addit: *Sed hæc omnia facient vobis propter nomen meum;* at principes Iudeorum persecuti sunt Apostolos, potius quam plebs. Subjungit: *Quia nesciunt eum qui misit me, si non venissem, et locutus fuisset eis;* et infra: *Si opera non fecissem in eis, etc.*; de persecutoribus ergo suis loquitur, et de eisdem utramque conditionalem propositionem profert.

9. *Tertia expositio.* — *Si Christus miracula non fecisset, num Iudei in non credendo peccassent?* — *Objectio.* — *Responsio.* — Tertius ergo modus exponendi esse potest, ut Christus loquatur de necessitate ex suppositione. Nam cum se Messiam esse prædicaret, si mira opera non præstisset, quæ de Christo prædicta erant, non esset dignus cui fides habetur; nam facta dictis repugnarent; et ideo dicere potuit: *Si opera non fecissem, peccatum non haberent.* Dices: ergo, antequam Christus efficeret omnia miracula quæ de Christo prædicta erant, non tenebantur in eum credere. Respondeatur negando consequentiam. Sicut etiam, si Christus non resurrexisset, non peccaremus in illum non credendo. Nam si Christus non resurrexit, *inanis est prædicatio nostra, inanis est et fides vestra, invenimus autem et falsi testes Dei,* 1 ad Cor. 15; et tamen non inde fit, antequam Christus resurgeret, Iudeos non fuisse obligatos ad credendum ei. Nam talis præcesserat prædicatio, quæ sufficiens erat ad credendum illum esse Messiam promissum, et ad sperandum fore ut implementur quæ deerant. Unde utrumque verum est, scilicet non fuisse expectanda omnia dicta miracula ad credendum, et quod, si facta non fuissent, non peccarent non credendo. Quia si Christus non fuisset facturus ea miracula quæ de Messia erant prædicta, neque etiam posset ita proponere se esse Messiam, ut alios ad credendum obligaret; et in sensu composito impossibile fuit sic prædicare, et non facere prædicta miracula. Præter hos modos occurrit alius, nimurum, ut illis verbis, *si opera non fecissem in eis,* non tantum miracula, sed tota Christi vita et prædicatio continetur, atque hoc modo nulla est difficultas. Quia sensus non est, *Si miracula non fecissem;* sed absolute, *Nisi dictis et factis meam fidem satis confirmassem, peccatum non*

haberent, ex quo non sequitur quod, si sola miracula deessent, etiam excusarentur. Et hic sensus videtur certe simplicior, eumque indicavit Cyril., lib. 10 in Joann., c. 30.

10. *Testimonii Joannis 10 expositio.* — Deinde circa aliud testimonium ex Joann. 10: *Si non facio opera Patris mei, nolite mihi credere*, addi potest alius, qui mibi videtur germanus, scilicet, si opera, quae facio, non sunt a Patre meo, id est, si non sunt virtute divina facta, sed dæmonis præstigiis, non est quod mibi creditur; si autem ipsa opera sese manifestant, quod sint divina, vel illis saltem credite. Ex quo sensu nulla difficultas relinquitur præsenti quæstiōni. Quia, licet Christo non essent miracula simpliciter necessaria, ut dignus fide haberetur, tamen postquam mira opera fecisset, si non satis constaret illa esse vera, et non ficta, non posset illi fides adhiberi; et hoc modo veritas miraculorum necessaria erat ad Christi doctrinam confirmandam. Quæ etiam non est necessitas simpliciter, sed ex suppositione, scilicet, supposito quod miracula fiant.

SECTIO II.

Utrum miracula Christi doctrinam ita confirmarent, ut ad credendum cogerent.

1. *Principio certum est, miracula Christi sufficientia fuisse ad doctrinam confirmandam, ita ut qui illa conspexerent, prudenter credere et possent et tenerentur.* Quod evidenter probant verba Christi paulo ante tractata, et alia multa in superiori sectione adducta, et quæ dicemus, evidenter hoc confirmabunt. Quod ergo hic explicatione indiget, illud est, utrum illa miracula evidenter ostenderent Christum esse Deum, atque hoc modo cogerent, seu necessitatem inferrent intellectui ad assentiendum. Ratio difficultatis est, quia illa miracula non solum ostendebant evidenter Christi doctrinam esse credibilem, sed etiam esse veram; evidētia autem veritatis cogit intellectum. Antecedens probatur, quia evidens est talia opera, scilicet suscitionem mortui, illuminationem cæci, et sanitates tali modo factas, scilicet, per solum imperium, vel per contactum, non posse fieri nisi divina virtute. Rursus est evidens illa opera esse facta a Christo in confirmationem doctrinæ suæ; propterea enim dicebat: *Ipsa testimonium perhibent de me, et, operibus credite.* Denique etiam est evidens, Deum non posse mentiri, et ideo nec etiam posse virtute

sua speciali mendacium confirmare; ergo ex his principiis evidens erat Christum esse Deum et vera dicere. In contrarium vero est, quia si miracula Christi evidenter intellectum convincerent, omnes necessario illum agnoscere, eique credidissent; atqui non ita accedit; ergo.

2. Ut controversiam hanc melius comprehendamus, revocanda tota Christi doctrina est ad duo principia, quæ ipse in ea persæpe inculcabat, quoniam ab illis, et totius doctrinæ veritas et cunctorum hominum salus pendebat. Unum est, esse se verum Messiam. Alterum est, esse verum Deum. Quanquam enim hoc posterius ex priori necessario consequatur, suppositis iis quæ de Messia in Veteri Testamento prædicta erant (ut superiori tom., disp. 2, late tractatum est), tamen quia intelligentia et cognitio Scripturarum non omnibus inerat, voluit Christus utrumque distincte prædicare, et miraculis confirmare. Unde ulterius advertendum est, miracula Christi duplíciter considerari posse: uno modo, ut conjuncta cum Scripturis et prædictionibus quæ de Messia erant; alio modo per se, sine conjunctione cum superioribus prophetiis, non aliter quam si illæ non præcessissent. Et sub hac posteriori ratione adhuc possunt duplíciter considerari: vel ut cadunt in assertionem Christi, qui affirmabat se esse Messiam et Deum, et in ejus veritatis confirmationem talia miracula faciebat; vel per se sola, ut sunt veluti effectus divinitatis sub illa humanitate latentis absque ullo alio principio.

3. *Miracula Christi per se sola non evidenter convincunt illum esse Messiam et Deum.* — Dico primo: miracula Christi per se sola, et cum nullo alio principio conjuncta, etiam si evidenter vera esse cognoscerentur, non erant sufficientia ad cognoscendum Christum esse Messiam aut Deum; assertio est per se evidens, quia poterat Deus illa miracula facere per hominem purum, qui non esset Messias. Nam etiam Christus Dominus de discipulis suis dixit: *Majora horum facient*, Joann. 14; de qua re dixi etiam priori tomo, disp. 3, sect. 2. Quinimo nec miracula sola per se evidenter ostendunt hominem esse sanctum, atque adeo nec vera semper dicere. Quia potest Deus miracula per peccatores facere; gratiae enim gratis datae non sunt evidētia signa sanctitatis.

4. *Ex miraculis Christi, cum Prophetarum testificatione conjunctis, divinitas ejus quomodo evidenter agnoscitur.* — Dico secundo: mira-

cula Christi, ut conjuncta prophetiis quæ de Messia erant, absque alia Christi testificatione sua divinitatis, evidenter ostendebant ipsum esse Messiam et Deum, dummodo et prophetiæ intelligerentur et crederentur, et veritas miraculorum evidenter cognosceretur. Ratio hujus posterioris partis est, quia cognitione conclusionis præsupponit cognitionem præmissarum. Quod autem ex illis principiis evidenter sequatur hec conclusio, probatur. Quia in Veteri Testamento satis clare revelatum erat Messiam futurum esse verum Deum, ut dicto loco ostendimus. Deinde prædicta erant ejus miracula tanquam propria signa, quibus certo dignosci posset; ergo qui intuebatur illa opera, et evidenter cognoscebat esse illa quæ Isa. 35 erant prædicta, evidenti signo cognoscere poterat Christum esse Messiam, et consequenter esse verum Deum. Et hoc argumento tacite usus est Christus, Matt. 4, cum Joanni interroganti per discipulos an ipse esset Messias, respondit quidem miracula ipsa quæ faciebat ostendens, alludens sine dubio ad locum Isaiae, in quo eadem miracula eisdem pene verbis prædicta fuerant, ut indicavit Chrysost., ibi hom. 37; et optime ac eleganter Lactantius, lib. 4 de Vera sapientia, cap. 15; et Athanas., lib. de Incarnat. Verbi, ejusque corporali adventu: *Evidētia (inquit) documenta intueantur. Ait enim Scriptura: Tunc aperientur oculi cœcorum*, etc. Quomodo audent vel contra ista oculos attollere, siquidem prophetia Deum adventurum significet, et signa ejus præsentia tempus ostendunt? et deinde notat, quanquam antiqui Prophetæ unum vel aliud miraculum patraverint, tam multa vero miracula edere, proprium signum fuisse Messiae. Quod etiam observavit Amb., lib. 5 in Luc., c. de Missione discipulorum Joannis ad Jesum. Alia Patrum testimonia videri possunt in priori tom., disp. 2, sect. 3.

5. *Objectio. — Responsio.* — Dicit aliquis hanc evidētiam solum esse consequentiæ, non consequentis; quia non solum fundatur in evidētia miraculorum, sed in testimoniis etiam Veteris Testamenti, quæ non erant evidenter vera, sed fide credita. Respondetur, quando testimonia continent prædictionem rerum futurarum, si res prædictæ jam videantur impletæ, evidenter tunc constare illa fuisse vera. Quamvis ergo prophetiæ, in quibus hæc miracula et signa Messiae prædicta erant, antequam implerentur, sola fide crederentur, visis tamen effectibus et evidenter agnitis, convincitur intellectus, ut credat illam præ-

Christus hæc doceret evidens erat audientibus. Subterfugere posset aliquis, dicendo minime repugnare ut Deus speciali auxilio et gratia gratis data concurrat cum homine ad facienda miracula, quamvis ipse homo illa faciat in confirmationem falsitatis. Quia hinc non sequitur quod Deus mentiatur, et nolum aliud est principium hujus repugnantiae, aut incommodum quod inde sequatur. Antecedens declaratur. Nam primo Deus dat sacerdoti supernaturalem facultatem consecrandi, et eam ipsius libertati commitit, ut bene, vel male ea utatur, et quando male utitur, Deus nihilominus speciali ac supernaturali auxilio cum illo concurrit ad faciendum opus vi sua miraculosum, et nihilominus malitia hominis in Deum non redundat; ergo idem erit in praesenti, proportione servata. Secundo, Deus potest conferre homini gratiam sanitatum, ut similiter ea bene, vel male utatur; ergo, sicut potest Deus concurrens cum tali homine ad conferendam miraculose sanitatem, etiamsi id faciat propter avaritiam vel vanam gloriam, potest etiam concurrere, etiamsi id faciat ad decipiens alios homines, atque adeo in confirmationem falsitatis. Tertio est ratio a priori, quia licet homo, qui facit miracula, dicat se id facere in confirmationem eorum quæ loquitur, non inde fit Deum concurrens ad eamdem confirmationem. Sed concurret solum ex vi prioris donationis, seu legis vel pacti quo statuit dare illi homini talem virtutem, et concurrens cum illo, propter quemcumque finem ipse operetur; ergo etiamsi Deus concurrat, non sequitur ipsum mentiri, nec confirmare mendacium; sed solum permittere ut alii putent confirmare. Denique nunquam est evidens miracula, prout a Deo procedunt, fieri in confirmationem veritatis, sed solum prout sunt ab homine. Quarto, amplius hoc exemplo illustratur difficultas: fingamus Deum decreuisse crastina die miraculum aliquod facere propter finem sibi cognitum, et alicui homini hoc revelasse. In eo casu posset hujusmodi homo errorem aliquem praedicare, ac dicere in ejus confirmationem factrum Deum tali die tale miraculum; numquid propterea teneretur Deus cessare a perpetrando miraculo, ne mendacium confirmaretur? aut propterea confirmaret, quia homo dicit propter hanc causam fieri, cum revera Deus hoc non intendat, nec propter hanc causam faciat? Sicut ergo in hoc casu, non obstante mendacio hominis, posset Deus mira-

cum facere, et non propterea mentiretur, licet homines deciperentur, nec confirmaret mendacium, quamvis homines id existimarent, ita quamvis propter alias causas daret alicui homini potestatem faciendi miracula, cum pleno dominio utendi illa in quemcumque usum, bonum vel malum, non propterea mentiretur concurrendo cum tali homine, nec revera mendacium sua auctoritate confirmaret, quidquid homines sibi persuaderent.

7. Responso. — *Deus mendacia confirmare potest per opera supernaturalia in confirmationem false doctrinæ facta.* — Hæc argumenta (ut verum fatear) sunt apud me difficia, et vellem potius eorum solutiones ab aliis discere quam docere. Unde Durand., q. 1 Prologi, illa breviter attingens, propter ea negat miracula facta in testimonium veritatis efficere evidentiam ejus. Cujus sententia fortasse est vera de evidencia mathematica, non tamen de evidencia morali, quæ sufficiat ad convincendum intellectum non admodum prave dispositam. Quod ita declaro, supponendo, id quod in materia de fide latius docetur, pertinere ad divinam providentiam ut non permittat aliquid falsum suo sub nomine et auctoritate ita proponi, atque exterius confirmari, ut secundum rectam rationem cogantur homines ad credendum illud esse dictum a Deo, et assentendum ea certitudine quæ omnem dubitationem expellat. Quia si Deus hoc permitteret, et cooperetur ad omnia signa et opera quibus mendacium confirmatur, quamvis revera proprie non mentiretur (ut argumenta facta [probant]), quodammodo tamen abuteretur sua potestate in præjudicium suæ auctoritatis, quæ fide dignus existit. Nam si, concurrentibus tot signis et divinis operibus exterius factis in confirmationem veritatis, adhuc posset subesse falsitas, nulla superesset via ad credendum Deo loquenti per homines, vel per signa, quod est contra divinam veritatem, et auctoritatem quam ipsum oportet habere in dicendo. Propter hanc ergo causam, existimo esse moraliter evidens, fieri non posse ut Deus concurrat cum homine ad perficienda vera opera supernaturalia, quæ fieri non possunt nisi virtute divina, et quod illa faciat in confirmationem false doctrinæ, quam ut divinam et a Deo revelatam proponit.

8. Objectio. — **Responso.** — Dices: ergo eadem ratione pertinet ad Dei providentiam non permittere apparentia miracula quæ vir-

tute dæmonum fieri solent, et ab Antichristo fiant. Quia illa etiam moraliter sufficiunt ad decipiendos homines, qui vix possunt vera miracula a falsis internoscere; illa autem deceptio, cum fiat sub specie divinæ virtutis et auctoritatis, etiam redundant in præjudicium ejusdem divinæ auctoritatis, et merito potest diminuere fidem quæ Deo loquenti debetur. Respondetur non esse eamdem rationem, quia quando sunt falsa miracula, semper relinquunt aliquis modus quo moraliter possint dijudicari, si homines quod in se est faciant ad cognoscendam veritatem. Primo, bene considerando ipsam opera, signaque et circumstantias eorum. Secundo, considerando personam, vitam et mores ejus qui sic loquitur et operatur. Tertio, considerando doctrinam ipsam, an aliqua in parte rationi aduersetur, vel aliis revelationibus divinis sufficienter propositis per Ecclesiam. Denique orando Deum, et consulendo Scripturas et prædictiones in ea factas, et signa data ne in errorem inducamur. Itaque non pertinet ad providentiam Dei non permettere falsa signa, quæ ad probationem et profectum electorum prosunt; sed pertinet ad providentiam Dei dare auxilium, ac modum, quo possint dijudicari et cognosci, quia non est divinæ bonitatis et sapientiæ ut permittat hominem tentari ultra id quod potest. Ac propterea quando, facta morali diligentia et investigatione, adhuc constat evidenter vera esse miracula quæ fiunt in confirmationem doctrinæ, nulla relinquunt ratio dubitandi de talis doctrinæ veritate, præsertim si miracula sint frequentia, et magna auctoritate ac potestate facta, et vite innocentia ac sanctitate confirmata, et in ipsa doctrina nihil contra honestatem, nihil contra rationem rectam, nihil denique contra alias divinas revelationes apparet. Quæ omnia in doctrina et miraculis Christi cumulatissime inventa sunt, et ideo ad moralem evidentiam præstandam satis fuisse creduntur. Ex his ergo ad difficultates possitas dicendum est, quamvis demus posse Deum permittere aliquem efficere miraculum, seu opus supernaturale, affirmantem se id facere in confirmationem alicujus rei, quæ in se falsa est, quam tamen Deus neque affirmare, neque confirmare intendit, nihilominus semper posse hominem, si velit omnia, quæ tale opus circumstant, attente considerare, ex eis conjicere quo spiritu tale opus fiat, ita ut saltem dubitare possit, et ad Deum recurrere, et quantum in se est facere ad

SECTIO III.
Utrum miracula Christi coegerint Angelos ad credendum Christo prædicanti se esse Messiam ac Deum.

1. D. Thom., 1 p., q. 105, ar. 8. — Quæstio hæc in malis Angelis tantum locum habet, quia beati semper Christum clare cognoverunt, ac in Verbo viderunt; habere tamen posset locum in quolibet Angelo, secundum suam naturam solum considerato. Et specialis ratio dubitandi in illis est, quia ipsi evidenter cognoscunt veritatem miraculorum, quia vident rerum substantias et actiones prout in se sunt. Unde, si miraculum sit supernaturale quoad terminum, ut quod duo corpora sint penetrative in eodem loco, postquam factum est, evidenter illud vident. Idemque est si miraculum sit in modo, vel ex parte subjecti, ut quando cæcus illuminatur, vel mortuus resurgit, vel ex parte actionis seu agentis, ut quando subito, et sine applicatione naturalis agentis, fit effectus sanitatis, vel alias similis. Rursus evidenter etiam sciunt hæc miracula non posse fieri nisi virtute divina, quia evidenter cognoscunt naturas rerum, et sciunt in tota natura non esse virtutem, quæ ad hoc se extendat, sed solum in auctore naturæ; ergo, visis hujusmodi miraculis, convincentur ad credendum Deum esse testem ejus doctrinæ, quæ per talia miracula confirmatur; ergo ad credendum ipsam doctrinam. Sed dæmones hoc modo videbant miracula Chri-